



## PROOEMIUM.

**M**edicinae, quatenus ad gerendas res publicas symbolam suam confert, binæ sunt partes; altera, quæ sanitati publicæ præest, præsidiorum ad sanitatem communium curam agens; altera, quæ in iure dicendo curiis operam suam ponit. Illam *publicam* (vulgo *Medicinische Polizey*) hanc *forensam* dicere fas est; utriusque notionem confundere nefas. Neque certe vel una alterave reliquis medicinae partibus sive dignitate sive difficultate secunda. Quantumvis enim laudium sibi mereatur, qui individuorum valetudini invigilans et propriam sanitatem et ingenii vires et animi curas difficili huic negotio impendit, haud minores tamen ille sibi comparare videtur, qui aut publicæ sanitati præest, multorum hominum simul salutem intentus, aut, qui administrandæ iustitiæ auxiliatricem operam collocat. Et hic etiam iudicium summe sæpe difficile esse, quis temere negaverit? Pone, invento neonati corpusculo, de infanticidio quaestionem moveri, quam Medico forensi resolvendam proponit Iudex. Cum in eo iudicio totus rei cardo versetur, an rea ultimo supplicio,



an poena minus gravi afficienda sit; nonne omnes ei animi vires intendendae, vt rite cuncta ponderet, inspiciat, conferat antea, quam sententiam proponat? Huc autem celebratam illam *Pulmonum Docimasiam* suam conferre symbolam, quis est, qui nesciat? Laudatur tamen egregium experimentum ab his, culpatur ab illis: neque negandum, suboriri nonnunquam casus, quorum prima specie magna sit vis in evertenda docimasiae pulmonalis auctoritate. Talis etiam ab optimo Praeceptore mihi amicisque meis publice praeterita hyeme relatus est; cumque me potissimum adhibuerit in explorandis veris totius eventus circumstantiis, occasionem inde arripere non dubitavi, ad honores Doctorales Specimine Inaugurali aditum mihi paraturus, de *Docimasia Pulmonum* conscribere — — non plenam quidem tractationem — sed ad eam saltem *animadversiones*, quarum illud potissimum argumentum sit, vt demonstrarem, inconcussam stare docimasiae nostrae auctoritatem legitimis sub cautelis, nec dubiam eam reddi vel nostra, vel aliorum similibus observationibus. Vos, quibus artis medicae dignitas contra obtrectatores vindicanda curae cordique est, favete conatibus meis!

---

§. I.

Pulmonum docimasia, sive — — vt Graeca graece exprimam — — *δοκιμασία* i. e. exploratio, Germanis *die Lungenprobe*, solenne est experimentum, quo coram iudice in thoracis neonati partes continentes atque contentas inquirat Medicus forensis, vt evidens fiat, an adsint conditiones sive vitae post partum actae sive iam ante eum extinctae. Praecipue vero in pulmones eorumque colorem, volumen expansum aut contractum, densitatem aut raritatem, gravitatemque specificam ad aquam attendunt tum Medicus tum Iudex, vt exinde quaestio mota resolvi possit. Inde experimenti, tanquam a potiori eius parte denominatio. Aquam experimentum requirit puram, saltem fontanam; vas amplum, profundum; Profectorem peritum; Medicum doctum, attentum,

§. 2.